

## Minni-Höfn (1)



Fagurt byggðastæði

Allt frá landnámi hefir verið kunn og góð höfn innst í Siglufirði að vestan, þó mest á fyrri öldum, því mjög er á hana gengið að síðustu, af náttúru og mönnum. Hafa og tvö býli er nærri henni hafa verið reist, þegar í fornöld, fengið nafn af henni. Stóð hið innra vestur frá syðri enda hennar og nefndist Innri- eða Minni-Höfn. Hefir þar byggðastæði verið mjög fagurt tún og engi síbreiða ein, neðan hliðar, slétt og grösug. Túnið hallandi grundir þurr og sjálfgjört, en engi rök. Stóð bærinn nokkuð upp frá sjó og sést nú óglöggt fyrir rúst hans, lítið ofan vegar og túngarður forn á kafla, sunnar og ofar. Mun hér hafa búið verið hinar fyrri aldir, en í auðn farið á 15. öld. Er býlis þessa getið seint á 14. öld, en virðist nýlega í auðn komið 1449. Hefir það máske valdið, að lækur féll norðan bæjar er nefnst mun hafa *Minni-Hafnarlækur* (2) er svo hefir brotist á túnið og mjög á það borið aur og mól og hulið að síðustu flest mannvirki, tún og garða, utan syðst og efst, en þar sýnir hinn forni garður takmörk þess, aðeins að sunnan og ofan, verður stærð þess því ekki séð.

Lönd hefir býli þetta átt upp til fjalla, þó ekki stór, en engi mikil og samfelld neðra. Mun mestur hluti landsins inn og niður frá bæ, þá hafa nefnst *Minni-Hafnarengi* (3) auk sérnafna nokkurra, en glötuð munu nú flest gömul örnefni kringum byggð þessa. Mun *Kvíaholt* (4) hafa nefnst ofan túnsins, þar kvíaból var en kallast nú Nýi-Stekkur frá Ytri-Höfn. Örskammt mun verið hafa til ytri merkja en tvær eru eyrar niður frá bæ. Nefnist nú vestan fjarðarhornsins *Stekkjareyri* (5) en sunnan *Langeyri* (6) og milli þeirra Langeyrarstekkur (7) lítill ás. Sunnan Langeyrar er flæðilón mikið og vestanvert í því lágur hólmi nefndur *Skeiðhólmi* (8). Sunnan lónsins eru hin sléttu engjalönd, nefnast þurrir bakkar við Siglufjarðará: *Hafnarnes* (9) upp frá því og allt suður að Snóksá *Votamýri* (10) en ofan hennar, nú neðan vegar: *Votumýrarhallar* (11). Allt til síðustu tíma var alfaraleið frá kaupstaðnum inn fjörur, austur Langeyri og suður um síkið og Hafnarnes; svo tvisvar austur yfir Siglufjarðará inn nokkuð frá Álfról uns leiðir skildu og Fljótamenn fóru innan Grísarár upp til Skarðsdals; voru þeirra ferðir tíðastar og nefndust því brotin á ánni *Fljótamannavöð* (12) einkum hið innsta og ofan við það *Fljótamannahylur* (13) er þó sumir nefndu *Finnhólahyl* [(13a)].



Hólsbrúin

Niður frá Skjaldargiljum eru skriðugundir grónar miklar og víðlendar því all vött hefir áin runnið, nefnast grundir þessar (utan ár) *Steinaflatir* (14) ofarlega á þeim er nú skilarétt Siglufjarðingna flutt þangað frá Hóli 1907 og nefnd *Hafnarrétt* (15). Yst á

grundum þessum ofan við veginn er hjábýlið *Steinaflatir* (16) byggt 1910 og eru þar tómtúsmenn. Þar utan bæjar er *Steinaflatalækur* (17) en út þaðan, ofan vegar nefnast engjalöndin *Háumýrar* (18). Beint upp frá bæ er skál allstór efst í hlíð, nefnd: *Jörundarskál* (19) úr henni kemur Minni Hafnarlækur. Sunnan hans nokkuð neðar í hlíðinni er lítil dæl, vel gróin, nefnd: *Nautaskál* (20) og niður frá henni, upp frá bæ neðst í hlíð: *Nautaskálarhólar* (21). Norðan lækjar og skálanna er melur allbreiður, nefndur: *Blýkerlingarmelur* (22) er sagt að fundist hafi í honum blýflaga nokkur. Sunnan lækjar og hólanna er hlíðin jafnlend allt inn að Skjaldargili ytra; er þar oft snjólétt á vetrum og nefnist svæði þetta *Þrautabeit* (23). Hér var og annar gamall vegur inn frá kaupstaðnum; lá hann um Hafnarbýlin bæði og inn með hlíð þessari, svo upp Skjöld, slakkana norðan Snóks og norðvestur til Úlfsdala um Dalaskarð; nefndist vegur þessi hér *Dalaleið* (24). Nálægt vegi þessum suðaustan við Dalaskarð er vörðubrot eitt, er nefnist *Styrbjörn* (25) halda sumir hér það dys, þó ólíklegt sé; en sagt er að þar hafi bráðdauður orðið Styrbjörn bóndi á Hóli, á heimleið frá Dalabæ með þunga byrði matar stolna frá Rafni bónda þar; var dauði hans kenndur göldrum Rafns. Aðrir segja þó Styrbjörn hafa búið í Úlfsdölum en stolið frá Höskuldi bónda á Meiri Höfn, sem líka var mjög fjölkunnugur talinn og hafi hann valdið dauða Styrbjarnar. Trúlegra er þó að þá hefði hann farið utar yfir fjallið. Virðist sögn þessi vera frá fyrri hlut 17. aldar, því þá voru þeir Rafn og Höskuldur kunnir bændur en oft munu hér hafa verið gripdeildir útlendra og innlendra. Rafn drukknaði við 6. mann 1636 af ofhleðslu við seladráp í ís.



Styrbjörnsdys við Dalaskarð

## Stafrófsröð örnefna Minni-Höfn

- **B** -  
Blýkerlingarmelur 22  
- **D** -  
Dalaleið 24  
- **F** -  
Fljótamannahylur 13  
Fljótamannavöð 12  
- **H** -  
Hafnarnes 9  
Hafnarrétt 15  
Háumýrar 18  
- **J** -  
Jörundarskál 19

- **K** -  
Kvíaholt 4  
- **L** -  
Langeyrarstokkur 7  
Langeyri 6  
- **M** -  
Minni-Hafnarengi 3  
Minni-Hafnarlækur 2  
Minni-Höfn 1  
- **N** -  
Nautaskál 20  
Nautaskálarhólar 21

- **S** -  
Skeiðhólmi 8  
Steinaflatalækur 17  
Steinaflátir 14  
Steinaflátir 16  
Stekkjareyri 5  
Styrbjörn 25  
- **V** -  
Votamýri 10  
Votumýrarhallar 11  
- **Þ** -  
Þrautabeit 23



Illviðrishnjúkur og Efrafall í bakgrunni